

Na Augustus lo tin estreno di obra musical “Mi Barrio, The musical”



ORANJESTAD (AAN): Departamento di Cultura di Aruba den fin di siman a suministra e detayenan di produccion di e obra musical “Mi Barrio, The musical.”

E obra aki ta un iniciativa local priva y Departamento di Cultura tey pa sostene artistanan local y nan iniciativa den tereno di arte en general, herencia cultural, den forma fisico y no-fisico.

Ta trata di un obra musical masha caluroso cu musica excitante di teatro, produci y dirigi pa Sr. Franklin Edmundo Kock.

Señor Kock ta un Arubiano cu un carera amplio di mas di 40 aña den baliamento y tambe como instructor di bailenan Latino y produccionnan teatral. El a traha tambe den e tereno di medicina na Aruba, Bonaire y Hulanda.

E obra musical ta explora e mundo compleho di emocion y otro relacionnan personal di e figura principal, ora cu e ta regresa su pais y bario despues di un ausencia di mas di 30 aña.

E premiere di e obra ta bay ta na Cas di Cultura den luna di augustus venidero. E presentacionnan lo ta di-

anan 2, 3 y 4 di augustus pa 8’ or di anochi; e anochi di apertura estilo Red Carpet ta diabierna dia 2 di augustus pa 8 or di anochi. E obra musical ta pa audiencia mayor di 13 aña.

“Mi Barrio, The Musical” ta atrae un audiencia varia, specialmente esunnan cu a biba of ta bibando leu for di nan pais of isla natal y ta regresa despues di hopi aña.

Den e obra musical aki, e figura principal Pedro Johnson ta hiba e publico cu ne riba un biahe den su sentimentonan profundo, mientras cu e ta deal cu e

perdida di su mama y e anticipacion pa bolbe back na su bario di infancia. Cu un elenco di mas di 30 actor, bailarin y vocalista local Sr. Kock a contrata Charles Croes como coach di actuacion.

Sr. Croes, un autor local y trainer di actor cu a aparece tambe den pelicula, na television y riba stage local y internacional.

STORIA DI KOCK:

E pasion di señor Kock pa teatro y arte a cuminsa na edad di cuater aña, ora cu el a presenta un piesa di ‘rock and roll’ riba stage di Lago Heights Club na Aruba.

Su famia semper a encurashe den su amor cu e tabatin pa baile y presentacion y esaki a hib’e na un carera di arte largo cu hopi logro. El a balia cu school di Baile Simadanza na unda el a studia ballet clasico, y estilonan di baile jazz, moderno y folklórico. Cu Simadanza el a presenta durante e halftime show di Super Bowl XIII na Miami Florida na aña 1979.

Otro logro di Sr. Kock ta choreografia y el a dirigi e show hopi famoso, Aruba Night y tambe Caribbean Jamboree Show den cooperacion cu e compania lo-

cal De Palm Tours; e tabata director artistico di Brazilian Samba School ‘Os Malandros’ na Eindhoven, Hulanda di aña 1993 pa aña 1995; y a asisti na produccion y direccion di diferente obranan di teatro musical escolar, durante e tempo cu el a biba na Hulanda for di aña 1989 te aña 1995.

E idea di e obra aki a nace 27 aña pasa, tempo cu Sr. Kock tabata biba na Hulanda y ta su prome obra di e caliber aki. ‘Mi Barrio, The Musical’ ta contene grabacion di musica Afro-Cubano, Salsa y Jazz Latino di Rubén Blades, ganado di diferente premio musical como cantante, compositor y musicante. Sr. Kock ta fungi como voorzitter di Dance Aruba Foundation, bou di cua ta cay school di Baile Pachanga, na unda e ta continua ta duna les di baile Latino y di fitness.

DCA ta applaudi e iniciativa aki. E ta remarcabel y esencial pa nos sigui duna sosten na nos artistanan local y ta hopi contento di por duna sosten na e proyecto aki en particular. Departamento di Cultura ta desea Sr. Kock hopi exito cu su obra.